

ГАДААДЫН ИРГЭН, ХАРЬАТЫН ГАЗРААС  
2020 ОНЫ 02 ДУГААР САРД ХЭРЭГЖҮҮЛСЭН  
ҮЙЛ АЖИЛЛАГААНЫ ТАЙЛАН

2020 оны 03 дугаар сарын 05

Улаанбаатар хот


Засгийн газрын хэрэгжүүлэгч агентлаг Гадаадын иргэн, харьяатын газар нь Төрийн албаны тухай хууль, Гадаадын иргэний эрх зүйн байдлын тухай, Харьяатын тухай хууль болон холбогдох дүрэм, журам, зааврыг үйл ажиллагаандаа мөрдлөг болгон гадаадын болон өөрийн орны иргэдэд түргэн шуурхай, чирэгдэлгүй үйлчлэхэд анхаарч 2020 оны 02 дугаар сард дараах ажлуудыг хийж гүйцэтгэлээ.

НЭГ. ҮНДСЭН ҮЙЛ АЖИЛЛАГААНЫ ТАЛААР

1.1. Виз, зөвшөөрөл, харьяатын чиглэлээр:

Тайлант хугацаанд Монгол Улсад оршин суух үнэмлэх 481 ширхгийг шинээр хэвлэн, 176 ширхэг үнэмлэхийн хүчинтэй хугацааг сунгаж, 47 ширхэг үнэмлэхэд хаягийн хөдөлгөөний бичилт хийн, гадаадын нэг иргэнд регистрийн дугаар олгосон байна. Үйлчилгээний танхимаар 828 иргэн, аж ахуйн нэгж, байгууллагын хүсэлтийг хүлээн авч шийдвэрлэжээ.

Нийт 1673 иргэнд зөвлөгөө, мэдээлэл өгснөөс 1800-1882 дугаарын утсаар 1062, 7585-1882 дугаарын утсаар 42, 7013-3459 дугаарын утсаар 12, биечлэн 136, автомат хариулагчаар 421 иргэнд зөвлөгөө мэдээлэл өгч ажиллалаа. Мөн Тайваний төлөөлөгчийн газар, Бүгд Найрамдах Солонгос Улсын Бусан хот дахь консулын газрын ажилтанд утсаар, таван улсын гадаадын найман иргэнд цахим шуудангаар зөвлөгөө, мэдээлэл өгч ажилласан байна.



Цахим визийн зөвшөөрлийн хүрээнд олон улсын хилийн боомт дээр “J” ангиллын нэг, “S” ангиллын зургаа, “A” ангиллын 33, “O” ангиллын тав, “B” ангиллын нэг болон хоёр удаагийн орох 14, “B” ангиллын олон удаагийн гарах-орох 32 визийн зөвшөөрөл олгож, нийт давхардсан тоогоор 95 аж ахуйн нэгж, байгууллагын 156 хүсэлтийг хүлээн авч хянан, 56 аж ахуйн нэгж, байгууллагын гадаадын 91 иргэний визийн зөвшөөрлийн хүсэлтийг холбогдох хууль, журмын дагуу хянан цахимаар шийдвэрлэжээ.

Үндэсний хөгжлийн газрын дэргэдэх хөрөнгө оруулагчдад төрийн үйлчилгээ үзүүлэх нэг цэгийн үйлчилгээний төвд 59 иргэнд зөвлөгөө мэдээлэл өгч, гадаадын 20 иргэнд визийн зөвшөөрөл, 24 иргэнд оршин суух зөвшөөрөл олгож, 57 иргэний оршин суух зөвшөөрлийн хугацааг сунган, долоон иргэний ангиллыг сольж, есөн иргэнд хасалт хийсэн байна. Мөн хөрөнгө оруулагчаар оршин суух зөвшөөрөлтэй 34 иргэнд зохих ангиллын виз олголоо.

2020 оны 02 дугаар сарын дээрх тоон үзүүлэлтийг өмнөх оны мөн үетэй харьцуулахад хувийн урилга олголт 40.0 хувиар, оршин суух зөвшөөрлийн хасалт 3.1 дахин, түр ирэгчийн хасалт 2.1 хувиар, визийн сунгалт 2.3 дахин тус тус өссөн, харин визийн зөвшөөрөл олголт 59.9 хувиар, виз олголт 55.6 хувиар, оршин суух зөвшөөрөл олголт 35.1 хувиар, оршин суух зөвшөөрөл сунгалт 14.4 хувиар, түр ирэгчийн бүртгэл 25.8 хувиар тус тус буурсан байна.

Хилийн зарим боомтыг түр хаах, нэвтрэх хөдөлгөөнийг хязгаарлах тухай Засгийн газрын холбогдох тогтоол, шийдвэртэй холбогдуулан Монгол Улсын виз, визийн зөвшөөрөл олголт, Монгол Улсад түр ирэгч болон албан, хувийн хэргээр оршин суух гадаадын иргэний тус байгууллагаас авах үйлчилгээний тоо буурсан үзүүлэлттэй байна.

Иргэний харьяалал, олон улсын болон гадаад улсын төрийн бус байгууллагын чиглэлээр:


Тайлангийн хугацаанд Монгол Улсын Ерөнхийлөгчийн нэг удаагийн зарлигаар нэг иргэн гадаад улсын харьяат болохоор Монгол Улсын харьяатаас гарсан байна. Дээрх иргэний мэдээлэл болон Ерөнхийлөгчийн зарлигийг Гадаад харилцааны яамны Консулын газар, Улсын бүртгэлийн ерөнхий газар, Монгол Улсаас гадаад улсад суугаа Элчин сайдын яаманд хүргэх ажлыг зохион байгууллаа.

Монгол Улсын харьяат болох хүсэлт гаргасан нэг иргэний хүсэлтийг хүлээн авсан.

Монгол Улсын харьяатаас гарч гадаадын таван улсын харьяат болох хүсэлт гаргасан 30 иргэний хүсэлтийг шинээр хүлээн авч, гадаадын нэг улсын харьяат болох хүсэлт гаргасан 20 иргэний хүсэлтэд холбогдох байгууллагаас санал авах ажиллагааг хийж байна. Мөн гадаадын зургаан улсын харьяат болох хүсэлт гаргасан 35 иргэний хүсэлтэд холбогдох байгууллагаас санал авч дүгнэлт гарган Ерөнхий сайдад танилцуулахаар Засгийн газрын Хэрэг эрхлэх газарт, нэг улсын харьяат болох хүсэлт гаргасан 27 иргэний хүсэлтийг Ерөнхий сайдад танилцуулснаар Ерөнхийлөгчийн Тамгын газарт тус тус хүргүүлэв.

Монгол Улсын иргэний харьяаллаа сэргээн тогтоолгох хүсэлт гаргасан харьяалалгүй нэг хүний хүсэлтэд холбогдох байгууллагаас санал авч дүгнэлт гарган Ерөнхий сайдад танилцуулахаар Засгийн газрын Хэрэг эрхлэх газарт хүргүүлсэн.

Мөн хоёрдмол харьяалал үүсгэсэн 21 иргэнийг шинээр бүртгэж мэдээллийн санд оруулсан ба 2020 оны 02 дугаар сарын байдлаар тус байгууллагын мэдээллийн санд хоёрдмол харьяалал үүсгэсэн 3576 иргэн бүртгэлтэй байна.



Тайлангийн хугацаанд үйл ажиллагаа эрхлэх зөвшөөрлийн хугацааг сунгуулах хүсэлт гаргасан 10 олон улсын болон гадаад улсын төрийн бус байгууллагын салбар, төлөөлөгчийн газрын хүсэлтийг хүлээн авсан.

Төрийн бус байгууллагын тухай хуулийн 23 дугаар зүйлд заасны дагуу олон улсын болон гадаад улсын төрийн бус байгууллагын салбар, төлөөлөгчийн 50 газрын 2019 оны үйл ажиллагаа болон санхүүгийн тайланг хүлээн авсан. 2020 оны 02 дугаар сарын байдлаар тус байгууллагад бүртгэлтэй үйл ажиллагаа явуулж буй 89 төрийн бус байгууллагын салбар, төлөөлөгчийн газар байна.

Гадаадын нэг улсын гурван гэр бүлд үрчлүүлсэн гурван хүүхдийн үрчлэлтийн дараах тайланг хүлээн авч, мэдээллийн нэгдсэн санд бүртгэлээ.

#### 1.2. Хяналт шалгалт, албадан гаргах ажиллагааны чиглэлээр:


Тайлант хугацаанд Гадаадын иргэний эрх зүйн байдлын тухай хуулийн холбогдох заалтыг үндэслэн таван улсын долоон иргэнийг байгууллагын даргын зургаан удаагийн тушаалаар тус улсаас албадан гаргасан ба мэдээллийг холбогдох газруудад албан бичгээр хүргүүлэх ажлыг зохион байгуулав.

Гадаадын иргэний эрх зүйн байдлын тухай хуулийн 34 дүгээр зүйлд заасан үндэслэлээр байгууллагын даргын хоёр удаагийн тушаалаар гадаадын нэг улсын хоёр иргэнийг Монгол Улсаас гарахыг түдгэлзүүлж, нэг удаагийн тушаалаар гадаадын нэг иргэний хилээр нэвтрэх эрхийг сэргээн ажиллалаа.

Мөн байгууллагын даргын нэг удаагийн тушаалаар гадаадын нэг иргэний Монгол Улсын хилээр нэвтрэх эрхийг хугацаанаас нь өмнө сэргээсэн байна.

Зөрчил шалган шийдвэрлэх тухай хуулийн 6.6 дугаар зүйлд зааснаар 82 зөрчлийг хялбаршуулсан журмаар шалган шийдвэрлэсэн ба Гадаадын иргэний эрх зүйн байдлын тухай хуульд заасан үндэслэлээр хоёр улсын гурван иргэнд гарах сануулга өгч, Хан-Уул дүүргийн Эрүүгийн хэргийн анхан шатны шүүгчийн долоон удаагийн захирамжаар гадаадын дөрвөн улсын долоон иргэнийг Шүүхийн шийдвэр гүйцэтгэх ерөнхий газрын харьяа Баривчлах төвийн байранд саатуулж, нэг удаагийн захирамжаар нэг иргэний саатуулах хугацааг сунгасан.

Тайлант хугацаанд дөрвөн удаагийн төлөвлөгөөт, есөн удаагийн төлөвлөгөөт бус хяналт шалгалтыг зохион байгуулж, нийт 225 аж ахуйн нэгж, байгууллага, гадаадын 225 иргэнийг хамруулсан. Түүнчлэн 61 гадаадын иргэн, 65 аж ахуйн нэгж, байгууллага /гадаадын 79 иргэн/, хоёр уригч иргэн /гадаадын хоёр иргэн/-д Зөрчлийн тухай хуулийн дагуу шийтгэл оногдуулж, 48,790,000 /дөчин найман сая долоон зуун ерэн мянга/ төгрөгийг улсын төсөвт төвлөрүүллээ.



2020 оны 02 дугаар сарын дээрх тоон үзүүлэлтийг өмнөх оны мөн үетэй харьцуулахад зөрчил гаргасан уригч хуулийн этгээд 14.0 хувиар өссөн, харин зөрчил гаргасан гадаадын иргэн 3.2 хувиар, албадан гаргагдсан гадаадын иргэн 46.2 хувиар тус тус буурсан байна.

## ХОЁР. УДИРДЛАГА, ЗОХИОН БАЙГУУЛАЛТЫН ТАЛААР

2.1. Тогтоол шийдвэрийн хэрэгжилт, дотоод ажил, хүний нөөц, сургалт, олон нийттэй харилцах чиглэлээр:

Байгууллагын 2020 оны 01 дүгээр сарын байдлаарх үйл ажиллагааны тоон мэдээг инфографик хэлбэрээр гарган мөн Монгол Улсын эдийн засаг нийгмийг 2021 онд хөгжүүлэх үндсэн чиглэлийн төсөлд тусгах байгууллагын саналыг нэгтгэн тус тус албан бичгээр Хууль зүй, дотоод хэргийн яаманд хүргүүлэв.

Засгийн газрын 2018 оны 382 дугаар тогтоолоор баталсан “Төрийн захиргааны болон үйлчилгээний албан хаагчид төрийн алба хаасан хугацааны нэмэгдэл олгох журам”-ын дагуу төрийн үйлчилгээний 46 албан хаагчид таваас 15 хүртэл хувийн нэмэгдлийг байгууллагын даргын тушаалаар олгож эхэллээ.

Байгууллагын 2020 оны сургалтын төлөвлөгөө, байгууллагын даргын 2020 оны 01-03/03 дугаар удирдамжийн дагуу 01 дүгээр сарын 08-аас 02 дугаар сарын 07-ний өдрүүдэд орон нутаг дахь газрын төлөөллүүдийн давтан сургалтыг зохион байгуулсан.

Мөн албан хаагчдын мэдээллийн цагаар “Байгууллагын ёс зүйн зөвлөлийн 2020 оны 01, 02, 03 дугаар тогтоол болон анхаарах асуудал”, “Байгууллагын даргын 2020 оны 01, 02 дугаар албан даалгавар”, “Шинэ төрлийн короновирустай холбогдуулан Засгийн газраас авч хэрэгжүүлж буй арга хэмжээ” сэдвээр тус тус

мэдээлэл зохион байгуулж давхардсан тоогоор байгууллагын төвийн 60, онлайн хэлбэрээр орон нутаг дахь газар, хэлтсийн 77 албан хаагч тус тус хамрагдлаа.

Байгууллагын хэрэгжүүлж буй чиг үүрэг, үйл ажиллагааг олон нийтэд сурталчлах зорилгоор “MNB World” сувагтай хамтран “Монголчуудын цагаан сар” танин мэдэхүйн нэвтрүүлгийг бэлтгэн олон нийтэд хүргэж ажиллав.

Мөн цаг үеийн нөхцөл байдалтай холбогдуулан гадаадын иргэдийн хяналт шалгалттай холбоотой асуудлаар тус байгууллагын Хяналт шалгалтын газрын хяналтын улсын байцаагчаас тодруулга ярилцлага бэлтгэн, олон нийтэд хүргэх ажлыг зохион байгуулж байна.

Төв болон орон нутаг дахь газарт нийт 62 өргөдөл ирснийг хүлээн авч, бүртгэлжүүлэн харьяалах газар, хэлтэст нь шилжүүлснээс 49 өргөдөл шийдвэрлэгдэж, 13 өргөдөл хуульд заасан хугацааны хүрээнд шийдвэрлэлтийн шатандаа байна. Хугацаа хэтэрсэн өргөдөл, гомдол байхгүй.

Байгууллагын даргын 2018 оны А/107 дугаар тушаалын хавсралтаар батлагдсан зохион байгуулалтын нэгжээс байгууллагын архивт баримт хүлээн авах хуваарийн дагуу 2019 онд үүсэж бий болсон Хяналт шалгалтын газрын байнга, түр хадгалах 207, Виз зөвшөөрөл, харьяатын газрын байнга, түр хадгалах 623, Хяналт шинжилгээ, дотоод аудит, орон нутгийн хэлтсийн байнга, түр хадгалах 41, нийт 871 хадгаламжийн нэгжийг хүлээн авч, байгууллагын архивын сан хөмрөгт нөхөн бүрдүүлэлтийг хийлээ.

Цасны хачир” ХХК-тай №0044 дугаар бүхий хамтран ажиллах гэрээг байгуулан байгууллагын төвийн А, Б байранд ариутгал, халдваргүйжүүлэлтийг албаны өрөө тасалгаа, цайны газар, спорт заал, авто граж, хонгилуудад хийсэн. Мөн шинэ коронавирусын халдвараас урьдчилан сэргийлэх зорилгоор нэг удаагийн амны хаалтыг 1000 ширхэг, хамгаалах хувцас 22 ширхэг, малгай 50 ширхэг, гар ариутгалын бодис 50 литр, нэг удаагийн бээлий 250 ширхэг, хошуувчтай маск 200 ширхэг, халуун хэмжигч найман ширхгийг тус тус авч албан хаагчдын эрүүл, аюулгүй байдлыг ханган ажилласан.

## 2.2. Хууль, эрх зүй, гадаад харилцааны чиглэлээр:

Санхүү, эдийн засгийн сайд, Хууль зүй, дотоод хэргийн сайдын “Гадаадын иргэн, харьяатын асуудал эрхлэх албаны тухай” 2002 оны 142/124 дүгээр хамтарсан тушаалыг хүчингүй болгуулахаар хамтарсан тушаалын төслийг боловсруулж, холбогдох материалыг Хууль зүй, дотоод хэргийн яаманд хүргүүлснийг хоёр сайдын 2020 оны 34, А/29 дүгээр тушаалаар хүчингүй болгож, ирүүлсэн.

Монгол Улсын дипломат, албан паспорт олгох, эзэмших, хадгалах журмын төсөлд тус байгууллагын зүгээс тусгах саналыг албан бичгээр, Гадаадын иргэний эрх зүйн байдлын тухай хуульд нэмэлт, өөрчлөлт оруулах тухай хуулийн төслийг Засгийн газрын хуралдаанаар 2020 оны 02 сарын 19-ний өдөр хэлэлцэхтэй холбогдуулан хуулийн төслийг дахин хэлэлцэж, саналыг Хууль зүй, дотоод хэргийн яаманд цахим шуудангаар тус тус хүргүүлсэн.

Тайлант хугацаанд таван албан тушаалтны урьдчилсан мэдүүлгийг Авлигатай тэмцэх газарт хянуулахаар хүргүүлсэн.

Авлигатай тэмцэх газрын [www.meduuleg.iaac.mn](http://www.meduuleg.iaac.mn) цахим системд Хувийн ашиг сонирхлын болон хөрөнгө, орлогын мэдүүлэг гаргах үүрэг бүхий 179 албан хаагчийн хөрөнгө орлогын мэдүүлгийг цахимаар хянан, баталгааны маягтыг хүлээн авч баталгаажуулсан.

Гадаадын иргэн, харьяатын газраас Авлигатай тэмцэх үндэсний хөтөлбөрийг хэрэгжүүлэх 2020 оны үйл ажиллагааны төлөвлөгөөг боловсруулан батлав. Албан хаагчдын 2019 оны хувийн ашиг сонирхол, хөрөнгө орлогын мэдүүлгийн тайлан, мэдүүлэг гаргаж өгөөгүй, гаргахаас татгалзсан, хугацаа хожимдуулсан албан тушаалтны нэрсийн жагсаалтын тайланг Авлигатай тэмцэх газарт албан бичгээр, албан тушаалтнуудын 2019 оны хувийн ашиг сонирхлын болон хөрөнгө, орлогын мэдүүлгийн 33 хуудас бүхий хураангуй тайланг Авлигатай тэмцэх газрын Хяналт шалгалт, дүн шинжилгээний хэлтэст цахим шуудангаар тус тус хүргүүлэв.

Авлигатай тэмцэх үндэсний хөтөлбөрийг хэрэгжүүлэх 2020 оны үйл ажиллагааны төлөвлөгөө, Гадаадын иргэн, харьяатын газраас авлигаас урьдчилан сэргийлэх чиглэлээр 2020 онд авч хэрэгжүүлэх үйл ажиллагааны төлөвлөгөөг шинэчлэн боловсруулан баталлаа.

Байгууллагын дарга Бүгд Найрамдах Солонгос Улсаас Монгол Улсад суугаа Элчин Сайд И Ёо Хунтай Бүгд Найрамдах Солонгос Улсын Элчин сайдын яамны байранд уулзалт хийн цаашдын хамтын ажиллагааны талаар санал солилцов. Мөн Бүгд Найрамдах Хятад Ард Улсаас Монгол Улсад суугаа Онц бөгөөд Бүрэн эрхт Элчин Сайд Цай Вэнь Руйг байгууллагадаа хүлээн авч уулзан хоёр байгууллагын цаашдын хамтын ажиллагааны талаар санал солилцлоо.

### 2.3. Мэдээллийн технологийн чиглэлээр:

Виз, зөвшөөрөл, харьяатын газарт ашиглагдах төрийн бус байгууллагын бүртгэлийн программ хангамжийг шинээр хийж ажиллагаанд оруулав. Мөн хүний нөөцийн “Staffdb” программ дээр Төрийн албан хаагчийн анкетыг цахим хэлбэр рүү шилжүүлэн хөрвүүлэх ажлыг хийлээ.

### 2.4. Санхүү, хөрөнгө оруулалт, хангамжийн чиглэлээр:

Гадаадын иргэн, харьяатын газрын даргын багцад Монгол Улсын Төсвийн тухай хуулийн дагуу 2020 онд 7.7 тэрбум төгрөг батлагдсан бөгөөд 02 дугаар сард 1 тэрбум 192.2 сая төгрөгийн санхүүжилт олгогдсоноос 823.4 сая төгрөгийг зохих дүрэм, журмын дагуу анхан шатны баримтыг үндэслэн зарцуулсан.

Гадаадын иргэний эрх зүйн байдлын тухай хууль, Улсын тэмдэгтийн хураамжийн тухай хууль, Засгийн газрын 2003 оны 172 дугаар тогтоолын дагуу энэ оны 02 дугаар сарын байдлаар 362.1 сая төгрөгийн тэмдэгтийн хураамжийн орлого, 147.9 сая төгрөгийн хүү торгуулийн орлогыг улсын төсөвт төвлөрүүллээ.

2020 оны худалдан авах ажиллагааны төлөвлөгөөг Хууль, зүй дотоод хэргийн сайдын 2019 оны А/223 дугаар тушаалаар баталсны дагуу [www.tender.gov.mn](http://www.tender.gov.mn), [www.shilendans.gov.mn](http://www.shilendans.gov.mn) цахим хуудаст ил тод байршууллаа. Тус төлөвлөгөөний дагуу 2020 оны Тоног төхөөрөмж, техник хэрэгсэл, Мэдээлэл, технологийн лиценз,

Гадаадын иргэдийн цахим бүртгэл, Нормын хувцасны тендерийг цахимаар зарлалаа.

#### 2.5. Хяналт шинжилгээ, аудитын чиглэлээр:

Гадаадын иргэдийн бүртгэл, хяналтын 2020 оны 01 дүгээр сарын статистик мэдээг Хууль зүй, дотоод хэргийн яаманд, байгууллагын 2020 оны 01 дүгээр сарын үндсэн үйл ажиллагааны мэдээг Үндэсний аюулгүй байдлын зөвлөлийн Ажлын алба, Засгийн газрын Хэрэг эрхлэх газар, Ерөнхий сайдын Ажлын албанд тус тус албан бичгээр хүргүүлсэн.

Байгууллагын даргын баталсан 2019 оны албан даалгавар болон үндсэн үйл ажиллагааны тушаалын хэрэгжилтэд хяналт-шинжилгээ, үнэлгээ хийн, санал, дүгнэлт боловсруулсан. Мөн байгууллагын үйл ажиллагааны 2001-2019 оны тоон мэдээллийг нэгтгэн “Гадаадын иргэн, харьяатын газрын үйл ажиллагааны статистик эмхэтгэл”-ийн төслийн эхийг боловсруулан бэлтгэлээ.

Санхүү, хангалт, үйлчилгээний газрын үйл ажиллагаанд дотоод аудит хийх байгууллагын даргын удирдамжийн дагуу харилцах, касс, цалин хөлс болон бусад холбогдох анхан шатны баримтын бүрдэл, төсвийн хөрөнгийг батлагдсан төсвийн хүрээнд зориулалтын дагуу зарцуулж байгаа эсэхэд хяналт шалгалтыг зохион байгуулж байна.

#### 2.6. Хилийн боомт, орон нутгийн чиглэлээр:

Гадаадын иргэний эрх зүйн байдлын тухай хуулийн 22 дугаар зүйл, Засгийн газрын 2018 оны 145 дугаар тогтоолд заасны дагуу гадаадын 11 улсын 49 иргэнийг орох чиглэлд хил нэвтрүүлэлгүй буцаасан.

2019 оны 12 дугаар сарын 13-ны өдрийн байдлаар Монгол Улсын хилээр нэвтэрч байгаа зорчигч, тээврийн хэрэгслийн бүртгэл, хяналт, мэдээллийн нэгдсэн системд бүртгэгдсэн нийт 100.001 гадаадын иргэдийн мэдээллийг Хил хамгаалах ерөнхий газар болон Хууль зүй, дотоод хэргийн яамны Бодлогын хэрэгжилтийг зохицуулах газарт тус тус албан бичгээр хүргүүлсэн.

Хөшигийн хөндий дэх “Чингис хаан” олон улсын нисэх буудал ашиглалтад орохтой холбогдуулан Агаарын замын боомт хариуцсан газрын орон тоог нэмүүлэх санал, хүсэлтийг Сангийн сайдад, Баян-Өлгий аймгийн “Өлгий” нисэх буудалд шинээр боомт байгуулж, олон улсын нисэх буудлын чиглэлээр үйл ажиллагаа явуулахад шаардлагатай орон тоо, гарах зардлын тооцооны саналыг Иргэний нисэхийн ерөнхий газарт албан бичгээр тус тус хүргүүллээ.

“Хилийн хяналтын байгууллагын ажлын уялдаа холбоог хангах тухай”, “Хилийн боомтыг шилжүүлэх тухай”, “Агаарын замын боомтын асуудлаар авах арга хэмжээний тухай” Хилийн боомтын үндэсний зөвлөлийн 2019 оны 03 дугаар сарын 12-ны өдрийн зөвлөмж, тогтоолын хэрэгжилтийн 2020 оны 01 дүгээр сарын биелэлтийг Хууль зүй, дотоод хэргийн яаманд хүргүүлэв.

“Зарлиг гаргах тухай” Монгол Улсын Үндэсний аюулгүй байдлын зөвлөлийн 2020 оны 07/05 дугаар зөвлөмж, “Засгийн газарт чиглэл өгөх тухай” /Шинэ коронавирусын халдвараас урьдчилан сэргийлэх тухай/ Монгол Улсын

Ерөнхийлөгчийн мөн оны 10 дугаар зарлиг, “Бэлэн байдлын зэрэгт шилжүүлэх тухай” Засгийн газрын мөн оны 62 дугаар тогтоол, “Бэлэн байдлын зэрэгт шилжүүлсэнтэй холбогдуулан авах зарим арга хэмжээний тухай” Засгийн газрын мөн оны 63 дугаар тогтоолуудын хэрэгжилтийг ханган ажиллах талаар албан хаагчдад мэдээлэл өглөө.

Мөн “Бэлэн байдлын хэсэгчилсэн зэрэгт шилжсэнтэй холбогдуулан авах зарим арга хэмжээний тухай” 2020 оны 03 дугаар албан даалгавар, “Шинэ коронавируст халдвараас урьдчилан сэргийлэх ажлыг эрчимжүүлсэнтэй холбогдуулан авах зарим арга хэмжээний тухай” 04 дүгээр албан даалгаврыг тус тус боловсруулан батлуулж, орон нутаг дахь газруудад хүргүүлэн биелэлтэд нь хяналт тавин ажиллаж байна.

“Хилийн зарим боомтыг түр хаах, нэвтрэх хөдөлгөөнийг хязгаарлах тухай” Засгийн газрын 2020 оны 39 дүгээр тогтоол, “Хилийн зарим боомтыг түр хаасантай холбогдуулан авах зарим арга хэмжээний тухай” Улсын онцгой комиссын мөн оны 01 дүгээр тогтоолын хэрэгжилтийг ханган, хяналт тавьж ажиллахыг орон нутаг дахь газар, хэлтэст албан бичгээр үүрэг өглөө.

ГАДААДЫН ИРГЭН, ХАРЬЯАТЫН ГАЗАР